

# DYDD GWENER Y GROGLITH

ESEIA 52:12–53:12; SALM 22;  
HEBREAID 10:16-25 [HEBREAID 4:14-16, 5:7-9];  
IOAN 18:1–19:42

---

---

## ● Gweddi agoriadol

Mae moment o dawelwch ar ddechrau ein gwasanaeth yn ein galluogi i feddwl am y diwrnod rydym yn ei gofio. Mae'r daith i Jerwsalem a Sul y Blodau yn y gorffennol... *(Saib)*

Nawr mae creulondeb, anghyfiawnder, gwrthod a chroes greulon... *(Saib)*

Nawr hefyd mae aberth gwirfoddol Iesu Grist, yn marw dros bawb a'i gwrthododd ac a fydd wastad yn ei wrthod, ynghyd â'r holl ddynoliaeth... *(Saib)*

Dduw grasol, bydd gyda ni a siarad drwy'r ysgrythurau a'r emynau a ganwn, er mwyn i ni ddechrau deall gwirionedd y dydd a alwn yn Ddydd Gwener y Groglith.

## ● Moliant

Fu cariad ddim farw  
ar y groes  
ond mae, gyda breichiau ar led,  
yn dal i'n croesawu,  
y drain plethedig  
a'r perlau o waed –  
coron addas  
i'r un sy'n frenin-was,

yn arwain ei bobl  
mewn buddugoliaeth  
drwy ddyffryn tywyll marwolaeth  
i wlad a addawyd.

Fu cariad ddim farw  
ar y groes  
ond, â breichiau ar led,  
mae'n dal i'n croesawu.

● **Cyffes**

Bob tro  
na ddywedwn dy enw  
gan ofni gwawd,  
fe'th wadwn.

Bob tro  
na ddown â'th gariad  
i sefyllfa,  
fe'th wadwn.

Bob tro  
y methwn weld dy wyneb  
mewn ffrind neu ddieithryn,  
fe'th wadwn.

Maddau i ni,  
fel y maddeui i bawb  
sy'n troi yn wylaidd atat,  
ac agor ein llygaid unwaith eto  
i realiti'r groes.

● **Diolch**

Dduw cariad,  
ar foment dawel  
cofiwn  
y cariad a'n dygodd  
i'r lle hwn.  
(*Tawelwch*)

Dduw cariad,  
ar foment dawel  
cofiwn  
y breichiau a estynnwyd  
ar ein rhan.  
(*Tawelwch*)

Dduw cariad,  
ar foment dawel  
down â'n diolch dwfn.  
(*Tawelwch*)